

Uoči konačne runde razgovora, Visoki predstavnik urgira na lidere BiH da nađu domaće rješenje

Razgovori koji su sada u toku i koji se vode pod okriljem Visokog predstavnika, Wolfganga Petritscha, o postizanju sporazuma oko optimalnog metoda provedbe odluke Ustavnog suda o konstitutivnosti naroda, ulaze u krucijalnu finalnu fazu.

Ovi razgovori predstavljaju najznačajnije pregovore o budućnosti Bosne i Hercegovine od Daytonu. Vrijeme ističe, i Visoki predstavnik podsjeća da lideri BiH sada moraju preuzeti odgovornost za građane koje predstavljaju i vratiti dignitet zemlji tako što će pokazati da mogu doći do sporazuma.

Ovo je istinski susret BiH sa sudbinom.

Iako se može reći da je tokom nekoliko proteklih sedmica postignut značajan napredak, politički lideri su proteklih dana naglašavali oblasti u kojima nisu mogli postići sporazum. Oni kažu: "Nećemo popustiti". Na ovo je Visoki predstavnik danas rekao: "Ni od koga se ne traži da popusti. Od lidera se traži da nađu zajednički jezik – u dugoročnom interesu onih koji ih podržavaju i u dugoročnom interesu svih građana BiH. Kao multietnička demokracija, BiH može jedino prosperirati na osnovama koncenzusa koji postignu demokratski izabrani lideri. Bez političkog dogovora – suštine evropske demokratske tradicije – narod BiH će biti osuđen da i dalje ostane zarobljenik prošlosti."

Prijedlozi koji se nalaze na stolu su prijedlozi stranaka. Uloga Visokog predstavnika u ovim razgovorima je da ih olakša i posreduje u njima. Njegova uloga je i da osigura da konačni sporazum bude simetričan po sadržini i da je u skladu sa modernim evropskim normama, kako je nekoliko puta do sada ponovio Upravni odbor PIC-a. Ovo znači da tri konstitutivna naroda u BiH, u oba entiteta, moraju imati puna prava. Pored toga, njihovi vitalni interesi moraju biti zaštićeni i oni moraju biti u potpunosti zastupljeni u institucijama vlasti i procesu odlučivanja u Entitetima. Prava Ostalih također moraju biti zagarantirana.

Ovi razgovori ne smiju propasti. U eri odgovornosti domaćih organa, svaki ozbiljan političar u BiH dat će sve od sebe da razgovori urode plodom. U vrijeme pristupa BiH Vijeću Evrope, političari moraju dorasti svojim obavezama. Sporazum o ustavnim amandmanima omogućit će im da se u potpunosti posvete obeshrabrujućoj ekonomskoj situaciji u kojoj se nalazi BiH, i da se bore protiv siromaštva od kojeg pate mnogi. Visoki predstavnik upućuje apel građanima BiH da daju podršku naporima njihovih lidera na postizanju sporazuma koji će koristiti cijeloj zemlji.